



太平三書卷之三

濟南張萬選舉之甫編輯



當塗勝槩二集

東田

入圖畫

謝朓

戚戚苦無悰攜手共行樂尋雲陟累榭隨山望菌閣
遠樹曖阡阡生烟紛漠漠魚戲新荷動鳥散餘花落
不對芳春酒還望青山郭

謝公亭

李白

謝公離別處風景每生愁客散青天月山空碧水流
池花春映日牕竹夜鳴秋今古一相接長歌懷舊遊

題青山館

許棠

境槩殊諸處依然是謝家遺文齊日月舊井照煙霞
水隔平蕪遠山橫度鳥斜無人能此隱來往謾興陞

遊青山記

陸游

十七日羣集于青山李太白祠堂祠在青山之西北
距山尚十五里墓在祠後有小岡阜起伏蓋亦青山

之別支也祠莫知其始有唐劉全白所作墓碣及近
歲張真甫舍人所作重修祠碑早飯罷遊青山山南
小市有謝玄暉故宅基南望平野極目而環宅皆流
泉奇石青林文篠真佳處也遂由宅後登山路極險
巖凡三四里又望許至一菴老道人出迎年七十餘
姓周濰州人居此山三十年顴頰如丹鬚鬢無白者
又有李媪八十矣耳目聰明談笑不衰自言嘗得異
人祕訣菴前有小池曰謝公池水味甘冷雖盛暑不

竭絕頂又有小亭亦名謝公亭下視四山如蛟龍奔
走爭赴川谷絕類吾鄉舜山但舜山之巔豐沃夷曠
無異平陸此所不及也亭北望正對歷陽周生言完
顏亮入寇時戰鼓之聲震于山中云夜歸舟次已一
鼓盡矣坐問信伯言桓溫墓亦在近郊有石獸石馬
制作精妙又有碑悉刻當時車馬衣冠之類極可觀
恨不一到也

次采石

許棠

東下經牛渚依然是故關客程臨岸盡鄉思入鷗閒
雨漲巴天浪雲遮楚國山漁翁知未達相顧不開顏
采石磯
王安石

歷陽之南有牛渚一風微吹萬舟阻華戎蠻蜀支百
川合爲大江神所纏山盤水秀不得泄到此乃有無
窮淵朱衣乘車作官府操制生殺非無權陰靈秘怪
不欲露燬犀得禍却偶然

雪中發江寧浦至采石

梅堯臣

泊舟斫枯葭敲火蕪岸傍冒嶺雲冥濛漫江雪飛揚
拖水修網澀出水朱髻矚曠然起遠懷風旗轉危檣
千帆共辭浦攙錯逆水翔落星始前瞻瞬目已後相
魴魚何時來楊花吹茫茫沙草不可辨雁立知汀長
山頭化石婦忽變素質光豈復願聞笛莫逢桓野王

遊采石記

陸游

十一日早出夾行大江過三山磯烈洲慈姥磯采石
鎮泊太平州江口謝玄暉登三山還望京邑李太白

登三山望金陵皆有詩凡山臨江皆曰磯水湍急篙
工併力撐之乃能上然今年閏餘秋早水落已數尺
矣則盛夏可知也三山自石頭及鳳凰臺望之杳杳
有無中爾及過其下則距金陵纔五十餘里晉伐吳
王濬舟師過三山王渾要濬議事濬舉帆曰風利不
得泊卽此地也是日便風擊鼓掛帆而行有大舟東
下者阻風泊浦淑見之大怒頓足詬罵不已舟人不
答但撫掌大笑鳴鼓愈厲作得意之狀江行淹速常

也得風者矜而阻風者怒可謂兩失之矣世事蓋多類此者記之以寓一笑烈洲在江中上有小山曰烈山艸木極茂密有神祠在山巔慈姥磯磯之尤巉絕峭立者徐師川有慈姥磯詩序云磯與望夫石相望正可爲的對而詩人未嘗掛齒牙故其詩云離鸞只說閨中恨舐犢誰知目下情然梅聖俞護母喪歸宛陵發長蘆江口詩云南國山川都不改傷心慈姥舊時磯師川偶忘之耳聖俞又有過慈姥磯下及慈姥

山石崖上竹鞭詩極高奇與此山偁采石一名牛渚與和州對岸江面比瓜州爲狹故隋韓擒虎平陳及本朝曹彬下南唐皆自此渡然微風輒浪作不可行劉賓客云蘆葦晚風起秋江鱗甲生王文公云一風微吹萬舟阻皆謂此磯也磯卽南唐樊若水獻策作浮梁度王師處初若水不得志於李氏詐祝髮爲僧廬於采石山鑿石爲竅及建石浮圖又月明繫繩於浮圖棹小舟急渡引繩至江北以度江面旣習知不

九平三書 卷之三 五
謬卽亾走京師上書其後王師南渡浮梁果不差尺
寸予按隋煬帝征遼蓋嘗用此策渡遼水造三浮橋
於西岸旣成引趨東岸橋短丈餘不合隋兵赴水接
戰高麗乘岸上擊之麥鐵杖戰死始斂兵引橋復就
西岸而更命何稠接橋二日而成遂以濟然隋終不
能平高麗國朝遂下南唐者實天意也若水何力之
有方若水之北走也江南皆知其獻南征策或請誅
其母妻李煜不敢但羈置池州而已其後若水自陳
母妻在江南朝廷命煜護送煜雖憤切終不敢違厚
遺而遣之若水所鑿石竅及石浮圖皆不毀王師卒
用以繫浮梁則李氏君臣之暗且怠亦可知矣雖微
若水有不亡者乎張文潛作平江南議謂當縛若水
送李煜使甘心焉不然正其叛主之罪而誅之以示
天下豈不偉哉潛此說實天下正論也

采石懷古

文天祥

不上蛾眉二十歲重來爲墮山河淚今人不見虞允

文古人曾有樊若水長江濶處平如驛况此介然衣
帶窄欲從謫仙捉月去安得燃犀照神物

采石

貢奎

斷磯江上碧嶙峋漠漠蘆花轉岸濱舟小風微猶勝
馬山高石立宛如人美渠釣艇滄波濶老我征途白
髮新寂寞蛾眉在天際遠烟青處晚雙顰

過采石

馬祖常

采石江頭秋月白蛾眉亭下灘聲咽繡衣玉斧曉霜

寒同是天涯苦行客酒倦一去海生塵青天玉尺埋
衣巾清江白鳥自今古岸艸江花秋復春我欲御風
遊八表醉裏高情覓三島闔闔雲深不可攀回首江
南數峰小

采石

貫雲石

采石山頭石頰色采石山下江流雪行客不過水無
跡誰似斷魂招太白我亦不畱白玉堂京華酒淺湘
雲長新亭風雨夜來夢千載相思各斷腸

宿采石驛

薩都刺

客路青山外鄉心落照邊
煥烟浮野樹涼雨過淮天
水調誰家笛江帆何處船
蛾眉亭上月今夜照孤眠

明太祖高皇帝采石磯新秋月色詩

素月澄澄斗轉移銀河一派徹
東西風吹鼓角爭先
應鳥避旌旗不敢啼
志若鳴蟾清絕翳心同碧漢淨
無私雄師夜宿皆英武
氣槩森森采石磯

月夜采石

西江月

楊基

采石磯頭明月蛾眉亭上秋
山古今來往幾人閒
羸得新愁無限不用朱唇低唱
何須纖指輕彈一觴一
咏到更闌驚起數行鴻雁

采石紀游

馬之駿

僑客馬之駿記曰余童子時由江行過采石心領其
勝然僅僅目之而已已未秋赴桐川謫從渡口濟舟
始達山面迫不暇及登覽事其冬以校讐滯姑孰會
新都潘景升自金陵來邂逅驩甚十年意中人一臂

輒昵乃相止度歲因謀曰姑孰固饒名勝遊無大於
采石者然貴遊苦喧旅游苦寂惟閒能衷之客之趣
饒閒以閒府愁可謂不善用長歲除閒無如兩人者
因期以廿九日戊寅與景升暨余客王廸之往晨起
雲重如墨霰淅淅作花景升來策行止余猶爲兩持
午乃決甫登舟十里餘斜輪掛崦嵫間積霾頓豁舟
大不能破風晚僅達山趾姑溪媿媚平駛大類吳中
兩岸皆平林曲隄蕭械掩映受水烟增其冷幻遠峰

如簇相向皆露頂倚肩余及景升廸之時時登艫首
望似饑兒赴王石宴海珍鼎載猶未羅列盤中餽飮
茗菰固已堪一飽也篝燈各賦一詩就寢質早晚霽
甚余笑謂景升使昨日止不來今豈堪惆悵邪步登
岸偕擗太白先生祠下先期李季重郡伯馳使供張
登謫仙樓飯焉樓頗多詩額余一二讀輒罷去夫夫
不與太白先生神遊至邪樓西北偏正視江日光攝
波爛如素錦俄見江豚出沒風颯然勁南舟皆絡繹

飛下帆影片黑帖水如羣蝶舞其快可想出樓取道
登山稍上得水部諸神祠神貌悉獐異再上爲五顯
廟卽僞漢陳友諒倉卒僭立處再上爲廣濟寺破廢
不可入景升咨歎者久之余戲舉似不見夫獐異者
赫如魚如乎人世善不可爲古先生亦爾爾景升大
噓再上爲蛾眉亭亭踞崖石突出江濤下視巉巖斗
削卽牛渚磯溫太真爇犀所也亭旁松五章森擎秀
不可狀再上爲問月亭呼酒至爲十餘引滿候人斂

釜滌鐺作下山計矣余及景升曰未也促山輿陟其
巔輿人憊甚爭作語相給誘悉置不聽乃蜿蜒從萬
松間行蒼鱗翠針時來撲人漸高稍欹仄然終不礙
輿可二里許遂造山頂俯江空濶滉瀆始収其全在
蛾眉亭望姑溪一線爾從頂視固自具體向欲斂其
倩以遜江邪傍眺獨望夫磨笄兩山稜稜爭長餘直
培塿爾千家鱗次如萍浮澤中北望隱隱見歷陽浮
屠頂計此是余十日後歸路爲之心飛循故道下復

至謫仙樓向津吏覓小刁溯洄山背石壁峻嶒立波
面無尺寸膚每轉輒得一奇相與大叫蓋山際水者
非純骨理不能久且濤紋雲氣經數千年激射洗濯
故酣其蒼潤陀而盤如虎丘之千人坐者以方計巔
而直如蜀之峽者以堵計突而洞如西湖之呼猿者
以口計其崦嵫參錯處皆黃鶴山樵白石翁皴墨巨
靈斧綦缺折矣舟歷寶積山已竟西北背乃命返棹
去引右脰歸引左脰酸疲正等揖祠別登大舟入郡

歲除日下春矣漚菴外史曰山游無止法凡游采石
者輿入太白祠登樓看江上蛾眉酌問月歸而韻于
文涎于齒可以止矣不必知山巔也躋巔猶百一遇
山而復舟焉以周其背非僻且貪者法無不止余固
非能貪山水者幸而俛盡之且向來日月窮不肯止
雨雪兆不終止有勇者必有僻差無負閒焉遊凡兩
日子及景升各得記一首詩如干首

過采石懷太白

冒愈昌

六平三書
卷之三
五
裘馬千金甕底春清平一調醉中親從君死後無狂
客寂寞詞人與酒人

登采石江亭

王崇簡

鬱高古路悶深蒼仄徑危磯上渺茫大日橫江鷹背
紫長松蟠石水根香屐驚巖際嵐光落望斷峰紋烟
影長偶爾停橈來此坐浪花雲葉各荒荒

謫僊樓

白居易

采石江邊李白墳遶田無限艸連雲可憐荒隴窮泉

骨曾有驚天動地文但是詩人多薄命就中淪落不
過君渚蘋溪藻猶堪薦大雅遺風已不聞

謫僊樓

杜荀鶴

氣逸何人識才高舉世疑禍生狂善賦陶令酒能詩
碧水鱸魚思青山鵬鳥悲至今孤塚上荆棘楚江濱

謫僊樓

入圖書

蘇軾

天人幾何同一漚謫僊非謫乃其游麾斥八極隘九
州化爲兩鳥鳴相酬一鳴一止三千秋開元有道爲

少畱縻之不可矧肯求西望太白橫峨岷眼高四海
空無人大兒汾陽中令君小兒天台坐忘真平生不
識高將軍手污吾足乃敢嗔作詩一笑君應聞

月夜采石贈郭功甫

梅堯臣

采石月下逢謫僊夜披錦袍坐釣船醉中愛月江底
縣以手弄月身翻然不應暴落饑蛟涎便當騎鯨上
青天青天有冢人謾傳却來人間知幾年在昔孰識
汾陽王納官貫死義難忘今視郭裔奇俊郎睂目真
似攻文章死生往復如康莊樹穴探環知姓羊

謫僊樓賦

程公許

鞭余馬之虺隤歲云暮以何之屆當塗之古邑俯姑
孰之寒谿聞翰林之僊李晚飄泊而莫歸弔陳跡之
焉在步欲往而意迷每逢人以揖問掩青山其駮駮
徑舍策以荒尋慘一丘其高臥萃霜樹兮變衰啾寒
蟲兮悲吟悵九原之不可復作覽余涕其沾衿王政
不襄六義不陳利莫可以還朴漓島乎而復醇靡於

魏晉之浮虛蕩於六朝之哇淫非作之命世之哲曷
反之正始之音在唐五葉開元有道皇惠顧於斯文
憫俗尚之佻巧盼冠劍於左右其將命而下埽孰頗
然於帝旁擗稽首以奉詔爛長庚兮孕精挺岷峨兮
毓秀玉爲骨兮冰爲神眉采媚兮目瞳瞭謾謾兮徑
松之風濯濯兮春月之柳翕乃鳴六鸞駕八龍犇列
缺轟豐露前飛廉以汎埽後望舒以景從文章其耀
光彩開東壁以破蒙馳驟乎屈宋之壘揮霍乎班馬

之鋒建安七子授職以前驅江左諸豪奔命於下風
徐庾褫魄而罔所措沈江眩顧而無以容當斯時也
文命中興竝世而作曰杜少陵聲黃鐘以應大呂撫
寶瑟以和瑤琴追古風於幽眇破一世之聾喑雖或
殊製而異調無非北琛而南金想其眼空四海面濶
青天烏紗白紵兮堂堂風埃之表錦袍玉帶兮昂昂
望夫之前名姬駿馬水涯山巔援北斗以斟酌浩一
吟而百篇清風爲之滌氣明月爲之破顏萬象奪其

太平三書 卷之三
巧衆芳失其妍是空清華天子賓以商顏之禮寵以
供奉之班沃以玉杯之水華以金花之牋雖鑑湖賀
老亦撫掌三歎而目之以謫仙也哉跡其始終間世
之偉溢爲詞章特餘事耳縱橫王伯之略義俠燕趙
之氣亦知與世少諧而莫我容寧當放浪終身以行
吾志固應卧元龍百尺樓孰能測北海尊中意不然
何以友子微於方外鑒尚父於風塵絕識超乎畛域
水境炯乎虛明彼以昭陽之譏而含怒脫鞵之傲而

見嗔者吾固怡然不屑况肯汚蟻於狂悖之永璘乎
蹇一生之落落歷四海其皇皇偶夜郎之生還卽故
人以徜徉終焉濁世之不可柰乘白雲而返帝鄉定
知骨蛻而神化豈有捉月於淼茫斷碑缺刻千古烝
嘗彼食方丈之雋永腰萬鎊之熒煌混古今其有幾
人曷知其存亾公雖失職而遠逝柰何聲采之彌彰
松吟風兮蕭索露晞艸兮慄慄空遺塚兮人世停騎
鯨兮超遙酌天瓢兮浩蕩企霞佩兮沈寥契神交兮

如在想逸氣兮橫秋吾將誦大鵬之賦歌半輪之月
追公於八極之外以息俗調之啁啾而無徒以楚人
只些之招也嗚呼

李翰林祠

張伯玉

嗚呼太白之精列仙之英氣爲人豪辭命世生浩浩
源流包括杳冥播蕩鬼神驅叱風霆大彌宇宙細入
無形醉峩山立筆響天聲銀潢倒注百川東傾皆不
勉而自得不思而混成縱之在天人非所能堂堂布

衣來趨漢殿金鑾容與玉宸宴見寶床命席御手調
膳僕奴奄刃妾婢飛燕冀人主之一寤豈沉迷於荒
宴嗚呼稻梁易畜扶搖難馴放情江海嘯傲煙雲咳
唾珠玉散漫無垠乃形留而神住咽喬松而返真彼
不知先生之遐躅徒誦醉骨於丘墳高風未泯薄醜
斯陳嗚呼寂寞千載繼者何人

謁太白祠

張治

太白仙魂何處招蛾眉亭下草蕭蕭青山舊宅自春

雨落日寒江空暮潮朱瑟遺音三歎絕炎方歸夢一
身遙玉魚金盃終塵土紫極丹丘謾寂寥

謫僊樓

陳孚

昔年李白身翻然袞裏明月飛上天罡風吹落瑤圃
莽雪兔跳落千丈泉白也已去八百年明月猶向江
中圓我行萬里擁使旃柳根偶繫東歸船三生似結
明月緣銀光射牖窺我眠夜深忽夢羽衣仙神如碧
河浮疎蓮脚踏赤鯨跨紫煙問月何在搖玉鞭聳身
忽滅鳴翩翩覺來試鼓朱絲絃起誦國風月出篇開
蓬視月月滿川魚龍吐浪聲濺濺

謫僊樓

楊士奇

謫僊祠下杏花殘歸客孤舟倚暮寒相好相思不相
見滿江風雨夜漫漫

謫僊樓

丘濬

采石江頭黃土一坏東有蛾眉亭西有謫僊樓謫仙
僊去不復返惟有江水日夜流人生一世幾何久不

如眼前一杯酒饑來文字不堪餐死後虛名竟何有
請君看此李謫仙掀揭宇宙聲轟然長安市上眠不
足長來采石江頭眠百世光陰一大夢衾天枕地無
人共寧知浩浩長江流不是糟生春酒甕此翁自是
太白精星月自合相隨行當時落水非失脚直駕長
鯨歸紫清至人雖死神不滅終古長庚伴明月

謫僊樓

李東陽

江天日暮雲蕭蕭城邊野亭春寂寥浮雲東來蔽江
色明月墮地誰當招我懷古人坐不寐鯨背之子神
僊標風鬢霧鬣事恍惚豈有赤脚凌雲霄舉杯問天
天不語予亦沉吟俯江渚縱有神仙亦妒才不然豈
謫來中土昭陽殿前牝雞午老鳳低飛入簾戶網羅
橫空鍛其羽雖雖和鳴竟何補燕雀之輩安足數平
生豪氣隘九區寸地未可容公軀有才如此不得意
自古非一誰當吁杜陵野老憐才客思君不負青山
色千古波濤十丈深至今猶恐蛟龍得英豪一去俱

陳迹楚水吳山眼中碧鳳去龍飛不復還仗劍悲歌
竟何益

謫僊樓

王守仁

攬衣登采石明月滿磯頭天礙烏紗帽寒生紫綺裘
江流詞客恨風景謫仙樓安得騎黃鶴隨公八極遊

謫僊樓

王寵

秋月出海珊瑚明舉眼忽見太白精雲光錯落照顏
色艸堂拂拭蛟龍驚修眉玉頰桃李春虬鬚如戟真

天人屋梁落月想像真髣髴猶得交其神我聞王孫
帝子皆如龍天然不與凡骨同江湖落魄黃金盞昂
霄吐氣成飛虹蓬萊閩苑在掌上長覺兩腋生清風
天子不能屈四海不足容飄飄九華山自有青芙蓉
獨畱神采照天地令人萬古如相逢

謫僊樓

王世貞

苔堦擁立壁遺像挂蠨蛸誦爾天門句不風江自濤
千秋無正始一代見詩豪三山雲作供姑孰水爲醪

霞明銅棺日天墮宮錦袍那能不相待空自躡金鰲
謫仙樓四絕
宗臣

闐闐天門夜不關酒星何日謫人間爲君五斗金莖
露醉殺江南千萬山

憶君乘月下金陵何處雲山不夜登一曲瀟湘秋萬
里至今疑在白雲層

楚水秋風薜荔高千山明月大江濤蛾眉亭下芙蓉
色猶似當年宮錦袍

楚江南折是天門江上蛟龍日夜喧爲爾片帆開幕
雨至今秋色鎖雲根

夜登采石

沈明臣

采石千秋地青蓮萬古名獨憐江月白不照錦袍行
帶得魚龍氣兼收山水情匆匆一夜宿誰與訊平生

登采石太白樓

盧純學

翠嶽青峰入紫霄千株霜樹莽蕭蕭孤臣祠廟還今
古大曆山河寄寂寥夜靜忽驚秋月墮波迴疑是酒

星搖蛾眉亭畔長江水不盡愁心萬里濤

采石謫仙樓

湯賓尹

雲寒益石出秋瘦尚松肥江畔月明明空濶照蛾眉
萬里澄彩色當年宮錦衣併命爭魚龍得意豈爾爲
狂潮卷天吼夜半叩蓬圍波上似人立髣髴捋鬚髭
呼酒對飲酌太息三致詞欲殺衆何意千秋某在斯
薄態從古然我行將焉之生有嚴陵灘死有李白磯

采石舟中時值大雪

袁中道

織塵不到小舟邊天賚餘生簡澹緣有寺有樓何異
宅非官非隱亦空仙愛山恰好添鮮色作客同忻兆
稔年鳥跡人踪都滅盡攜筇一拜李青蓮

泊采石謫僊樓下

林枝橋

僊豈燒丹覓名疑供奉垂行藏詩卷在心事酒杯知
樓迴江仍抱亭虛月不遲江東行蹟遍千載有餘思

登太白樓醉歌

韓上桂

太白太白我以一杯未乾之濁酒酹爾萬古不盡之

英魂人生去住初何定蓬萊再換碧桃根太白之星
緣何來采石之沒胡爲哉始胡醒而遽降今胡醉而
忽迴獸錦宮袍能有幾高才磊落心徒哀心徒哀思
未已上有千尋之石壁下有不測之江水水蕩蕩以
成波山蒼蒼而結綺布錦繡于空中散烟霞於萬里
羅浮之頂恍逢君天台之外標紅雲當年綵筆今何
在草木縹緲輸靈文鸕鷀杓鸚鵡杯汝生酌盡幾多
酒一斗百篇枉自雄諷誦遺文空在口君不記沉香
亭北花發時醉中立取清平詞一曲未罷一曲進徒
然白壁售毀青蠅緇又不記華陰縣裏騎驢日長吏
執之使勿失任爾霜蹄歷塊奇咫尺困蹶何能逸曾
說蜀道難何地非太行太真旣善怨力士更多讒終
身承寵澤不過供奉班一應永王召骨銷膽易寒不
如去逐月踪跡青冥間霓光吐萬丈六鰲相往還念
此往事懷太惡把酒灑空相對嚼日月經天彩未休
天賦汝生旣不薄何必懸名麒麟閣燕然鐫功亦銷

鑠後庭玉樹今寂寞有美一人不可作浩浩長江天
際流蘆花落盡楊花浮此江若可化醞醪與爾長消
萬古愁

泊牛渚

劉禹錫

蘆葦晚風起秋江鱗甲生殘霞忽改色遠雁有餘聲
戍鼓音響絕漁家燈火明無人能詠史獨自月中行

牛渚

許棠

東下經牛渚依然是故關客程臨岸盡鄉思入鷗閒

雨漲巴天浪雲遮楚國山
戲翁知未達相顧不開顏

泊牛渚

潘閔

扁舟不復見袁宏故壘猶連謝尚城
潮落潮來知旦暮雲收雲出辨陰晴
騎鯨仙子千年恨化石佳人萬古情
牛渚磯前浪如屋區區名利與生輕

泊牛渚

梅堯臣

落帆牛渚前便爲牛渚宿波搖殘照中
采翠浮巖谷巖谷足幽篁石上羅寒玉
裁作媧氏笙堪吹鳳凰曲

楚客夕無眠獨將清籟續更看江月來還想燃犀燭

蛾眉亭

霜天曉角

韓元吉

倚天絕壁直下江千尺天際兩蛾凝黛愁與恨幾時
極 怒潮風正急酒醒聞塞笛試問謫僊何處青山
外遠烟碧

蛾眉亭記

吳 澄

姑孰之水西入大江其洄有山突起曰采石橫遏其
衝江之勢撞激齧射浩蕩而不可禦山之骨峻削刻

露巉絕而不可攀其下有磯曰牛渚晉溫常侍嶠燃
犀燭怪之所也其上有亭曰蛾眉宋熙寧時張守瓌
之所創也俯眺淮甸平睨天門一水中通三山旁翼
修曲如蛾眉狀亭之所以名也據險而臨深凭高而
望遠水天一色景物千態四時朝暮變化不同雖巧
繪莫可殫也瀕江奇觀未能或之雙者熙寧至今餘
二百年亭之嗣葺蓋亦屢矣延祐五年秋予舟過之
又得寓目而慨亭之將敝也明年夏留金陵姑孰郡

侯命其客持書抵予曰采石鎮距郡三十里自古號
爲重地多事之際英雄豪傑鷹揚虎鬪承平之世韻
人勝士醉唵醒賞流風概可想見蒙恩守此土幸與
千里之民相安境內凡有前代遺蹟不敢坐視其廢
壞峨眉亭三門櫂之朽者易矣瓦之缺者補矣壁之
塹者今已甃矣塗之以堊纒之以楮肇謀於歲初訖
工於春杪一時聞者樂趨其事中朝達官大書其扁
亭與名額煥然一新重修歲月不可以無述敢徵一

言惟侯嘗仕江西行省綽有令譽其牧郡也廉正如
江西時聲實孚於上下郡事治而心思靡所不周一
亭之微可以觀政它日郡民思之觸目皆遺愛也豈
特四方來遊來觀之人喑喑勸羨而已哉嗚呼近年
氣習日異仕而無媿耻者十八九也旦夕繭絲其民
苟獲盈厭則翩翩而高翔官府猶傳舍耳事之當爲
者有不暇爲况可以不爲者而肯爲之乎如侯之爲
其識慮遠矣然侯之聲不待今而著也侯之寔又豈

以久而渝哉侯名鐵柱亞中大夫太平路總管翰林
學士承旨司徒公之子也是歲五月丙辰記

蛾眉亭

水調歌頭

盧摯

亭榭踞雄勝杖屨踏烟霏山靈聽足春雨忙遣暮雲
歸我欲天門平步消盡江濤餘怨嘗試問馮夷何物
兒女子剛道似蛾眉雁行斜松影碧艣聲微一齊
約下風景莫是爲湘纍政有玉臺溫嶠未暇炊犀下
照貪著芰荷衣好在初明觀重與故人期

